

«ҚАТАФОН ҚУРБОНЛАРИ ХОТИРАСИ» МУЗЕЙИ

МАХМУДХЎЖА БЕҲБУДИЙ

ТАНЛАНГАН АСАРЛАР

I
жилд

Тошкент
«Akademnashr»
2018

ИККИ ЭМАС, ТҮРТ ТИЛ ЛОЗИМ

Биз, туркистонийларға туркий, форсий, арабий ва русий билмоқ лозимдур. Туркий, яъни ўзбакийни сабаби шулки, Туркистон халқининг аксари ўзбакий сўйлашур. Форсий бўлса, мадраса ва удобо тилидур. Бу кунғача Туркистонни(нг) ҳар тарафидаги эски ва янги мактабларинда форсий назм ва наср китоблари таълим берилб келгандур.

Барча мадрасаларда шаръий ва диний китоблар арабий таълим берилса ҳам, мударрисларни тақриру таржималари форсчадур. Бу қоида, яъни дарс китоби – арабий, муаллими – туркий, тақриру таржимани – форсийлиги хейли ажибдур.

Туркистонда қадимдан бери бу уч тил жорийдур. Чунончи, эски ёрлиқлардан маълум бўлурки, Туркистонда эски амир ва хонларни амри, фармойиш ва муборакномалари доимо туркий, яна айни замонда дорулқазо ва адабиёт таҳрирлари форсий ёзилар экан. Бу қоидалар зотан яхшидур. Аммо бора-бора ёинки кела-кела усули таълим ва китобатга иҳмол пайдо бўлуб, ҳозир бир даражага келибдурки, аҳли савод ёинки аҳли илмни юздан тўқсон тўққузи бу уч тилда мукаммал таҳрири адабийга молик йўқдур, яъни усули таълим ва тадрисни ислоҳ этмак керак. Ўтайлук!

Туркистоннинг Самарқанд ва Фарғона вилоятларинда форсча сўйлайтурган бир неча шаҳар ва қишлоқлар бордур. Бухоро ҳукуматининг тили форсийдур. Форс шоибу удабоси асарлари қиёматгача лаззати кетмайдурган хазинаи маънавийдурки, мундан фойдаланмоқ учун оврупойилар миллиярдлар сарф этарлар.

Бизга саодатдурки, туркий ва форсийни таҳсилсиз билурмиз. Ҳар туркни форсий ва ҳар форсни туркий билмоғи лозимдур.

Форсий билган киши Фирдавсий¹⁸², Бедил, Саъдий, «Маснавий»дан қандай лаззат олса, туркий билганлар Фузулий, Навоий, Боқий, Сомий, Абдулҳақ Ҳомид, Акрамбек, Санойи, Нобий,

¹⁸² Мақолада тилга олинган барча тарихий шахслар ҳақидаги изоҳлар «Танланган асарлар»нинг сўнгги қисмида берилади.

Ножийлардан, яна Толстой, Жул Верн ва уламои замоний асари-ни туркий таржимасидан лаззат шундай оладур.

Фаранг ва рус донишмандларининг асарларидан фойдаланмоқ туркий ё русий ва фарангий билмак ила мумкин бўлур, на учунки бутун усмонли, Кафказ ва Қозон турклари замона уламоси асарини туркийга таржима қилиб, кўпайтурганлар, яъни туркий билган киши замонни билур. Турк тилига ҳар бир янги ва нафлик китоблар барча тилдан таржима бўлгандур. Араб маданияти юоний, Суқрот, Буқрот, Фалотунлардан фойдалангандек, замони ҳозира маданияти Толстой, Жул Верн, Кеплер, Коперник, Ньютоналардан фойдаланур. Мақсаддан узоқ тушдик.

Реални сабаби шулки, биз Русия табаъаси, гражданимиз руслар ила баробар ҳуқуқи мадания ва мулкияга моликмиз, аммо беистеъоддлигимизга таассуф қиласмиз. Банк ва судхоналар, суд маҳкамалари, нотариус, темир йўл, хулоса, замонни пайдо қилган ҳар бир янги нимарсалариға мұҳтож бўлсанк аввалғи қадамда руча билмоқ лозим келур. 50 йилдан бери биз Русияга тобе ва аммо бу бир умр ичинда ҳануз руслар ила мусулмонлар бир-бирларини яхши танимайдурлар. Бизим фикримизча шулки, руслар бу кун келди, эртага кетар йўқ. Бу галат фикр жуғрофия, тарих ва замондан билмазлигимиздан келур. Бизга лозимки, ўз нафимиз учун русча билайлук, ҳукумат мактабларинда ўқуйлук. Давлат мансаблариға кирайлук. Ватанимизга ва ўз динимизга хизмат этайлук. Мусулмон бўлуб туруб, тараққий қиласйлук. Бу замон тижорат иши, саноат ва мамлакат ишлари, ҳатто дини ислом ва миллатга хизмат илмсиз бўлмайдур. Масалан, бутунги «подшолик дума»га ўз дин ва миллатимиз нафига сўзламоқ бизлар учун мумкин бўлур. Аммо анда бориб сўйлагувчи киши бизга йўқ. Анда бориб нафи Ватан ва миллатга сўйламоқ учун Русия мактабларинда бир ўн сана ўқумоқ керак, замондан, қонундан хабардор бўлмоқ керакдур.

Хулоса, бутун бизларга тўрт тилга таҳрир ва тақрир этгувчилар керак, яъни арабий, русий, туркий ва форсий. Арабий тил дин учун на даража лозим бўлса, русий ҳам тириклик ва дунё

учун лозимдур. Арабий билмасак дин, русча билмасак дунё қўлдан кетар. Туркий ва форсийни кераклигича сўз йўқдур. Яна бир тил ва хат борки, бутун олам бир-бири-ла анинг ила сўйладидур. Ул Фарансе тили хатидур. Файридиннинг илм ва хатини ўрганмоқ шариатча дурустдур. Ҳадиси шарифдан маълум бўладурки, жаноб пайғамбар ўз саҳобаларидан Зайд бин Собит(ра) яхудий хатини ўқуб-ўрганмоқга буюрган эканлар. Ва ул жаноб амри ҳазрат нубувват паноҳи ила яхудий хатини ўрганиб, ҳазрат пайғамбарға яхудийлардан келатургон хатларни ўқуб берар эканлар («Саҳиҳи Бухорий», жуз 4, саҳифа 156).

Ҳолбуки, ул зоти бобаракот пайғамбаримиз қуввати ҳокима эгаси эдилар. Яхудийлар маҳкум ва тебе эди. Ал-он Русия ҳоким, бизлар анга тебе ва ўз тириклигимиз учун алар хатини билмоқ зарур ва, ҳадиси шариф далолатинча, дурустлигига жойи инкор бўлмаса керакдур.

*Маҳмудхўёса
«Ойина». 1913 иил 20 август. №1. 12-14-бетлар*

МАЙДА ҚАРЗ

Мелкий кредит исми ила ҳукумат Туркистон музофотининг аксар ноҳияларинда кичкина бонкларнинг уч санадан бери очмоқда ва муҳтасар тартиби шудур.

Ҳар ноҳия, яъни вулус(т)нинг икки-уч даҳасидан уч-тўрт нафар аъзо сайланадур. Бу аъзолар даҳа аҳлидан ақча қарз олатурганларга саккиз-тўқузыз ой муддат ила ўн икки фоиз, яъни бир юз сўмга бир йил муддатда ўн икки сўм фойда ила қарз берадурлар.

Майда банкни «Ширкат-товарищество» аталадур. Ширкатлардан кимга қанчা қарз бермоқ мусулмон аъзодан членлар ихтиёриндадур. Ҳар бир ширкат учун маҳсус идора-правления ўшал ширкатни дохил ҳудудинда барпо бўлуб, ақча ва ҳужжатлар учун темур сандуқ – кассалар қурулгандур.